

**Ọkwukwo izi Pọlu
gbaznenu
Ele Efesọsi**

Nhne gbasiri ọkwukwo izi ka

Nụ Ọkwukwo izi Pọlu gbaznenu ele Efesọsi, ọ naakanụ ọgbako Chiokike nhne gbasiri olile anya be nwernu. Risi ikwu-ọnu Pọlu bụ nụ Karaịsi nwurnu ẹnwu n'olu ọgba ma ọ znohia aị hite nụ mmehie. Kọvu nụ Chiokike mernu o hi n'ẹnwu lizo, ọ daziri ẹli n'akarikwnunga Chiokike n'oligwe, hne ọ zi neechi ọwa. Ọ jeechi masi ọwa ke vazne nụ ruwhnu.

Karaịsi mernu ele Ju nụ ele buo ele Ju buru otu, kwnornu nụ ọ kwnadnarnu mkpọ irno ke kewaru be (2:14). Ka neegesi nụ Chiokike jeehite n'Enine a mee mkpoma ele Karaịsi buru otu, mee be ziri n'udno n'esilawuru be, (4:3), ma ele Karaịsi buru otu. Ka bụ nhne zi mkpa n'ọkwukwo izi, ka mernu Pọlu gbaru a k'agida neegesi nụ ọ buru oma ma ele Karaịsi ziri n'otu. A nwernu otu Nyenwe aị, ọkwnata mkpoma aị bụ otu, ọwuwu mini aị bụ otu, ke neeme ele Karaịsi ghọ otu anọ-ehni.

Nhne zi n'ọkwukwo izi ka

Obekwu ikwu (1:1-2)

Karaịsi nụ ọgbako a (1:3---3:21)

Budnu ikne hite nụ Karaịsi (4:1---6:20)

Ibekwu ipne-aznụ (6:21-24)

Obekwu ikwu

¹ Mawa, Pọlu, nye izi Karaịsi Jizōsi hite n'echiche Chiokike, naagbaznenu ele Chiokike ke zị n'Efesōsi ọkwukwo, ele kwnagwụ mkpọma nụ Karaịsi Jizōsi.

² Oru nụ udno ke hi n'aka Chiokike Nda aị nụ Nyenwe aị Jizōsi Karaịsi dazịnu anụ.

Ngōzi ke enine

³ A ọọtunu Chiokike nụ Nda Nyenwe aị Jizōsi Karaịsi mmamma, nye jiri kpakara ngōzi ke oligwe kesi aị n'enine nụ rime Karaịsi. ⁴ Chiokike beru ọsno hōrukwo aị ma a bụru ele ke a kwnornu Karaịsi, sụ ọ kpuru ọwa, ma a bụru ele zị nsọ, ele nwée ọru nụ ruwhnu a kwnornu ọwhnun'anya a. ⁵ O beru ọsno hōru aị, o kwubnanya aị lele rụmu a hite nụ Jizōsi Karaịsi lele kpa o jiri masị a. ⁶ Ngwa ma a ja Chiokike kwnornu agịda oru a ke o nyernu aị etekne hite nụ Nnwọ a ọ whnurnu n'anya. ⁷ Chiokike gbaharu aị hite n'ọvnarna Karaịsi wụsiri, nụ ọ gbarụ mmehie aị kwnornu n'oru a zị agịda, ⁸ bụ ke o nyernu aị n'ọkwnamarna, ya nụ akoniche nụ ọghohia a. ⁹ Chiokike mernu a mahia nhne miri emi ke echiche a lele kpa o jiri masị a hite nụ Karaịsi. Ọ marnu mmụma ¹⁰ o mezu echiche a ka nga ige a duru. Ka bụ ma o gwebnanya kpakara nhne zị n'oligwe n'ọwa n'otu nụ mkpururu risi Karaịsi.

¹¹ Chiokike hōrukwo aị ma a bụru ele ke a nụ rime Karaịsi, hne o beru ọsno kpebi kpakara nhne lele kpa echiche a jiri zị. ¹² Chiokike mernu ka ma a znarni a kwnornu igwugwu a. A bụ ele mbom neele anya Karaịsi. ¹³ Anụ bụ masị ele Karaịsi nga anụ nurnu ezi ọka wam, ke bụ izi ọma ke ọznohia

anụ. Anụ kweru nhne anụ nūnu, Chiokike hñasiri anụ iri Enine Nso nū anụ bụ ke a lele kpa o kweru mkwna. ¹⁴ Enine Nso wam zi nū rime aị, a maam nū Chiokike jeenyeri aị kpakara nhne bụru ọma nga Chiokike jaagbahakwo ele ke a. N'ige wam, a jaaznari Chiokike kwnornu igwugwu a.

Okpukpe Pọlu

¹⁵ Kam kpayarū, nga me nūnu nhne gbasiri ọkwnata mkpoma anū nū Nyenwe aị Jizosi, ya nū ọwhnun'anya anū nwernu hne rumu Chiokike zi, ¹⁶ m gwépuḡam aka nū ọ tūnu Chiokike mmamma nū risi anū. M zi m neekpenu anū okpukpe kpakara ige. ¹⁷ M naariasno Chiokike ke Nyenwe aị Jizosi Karaịsi, Nda ke igwugwu, o mee anū nwehia enine akoniche, kpumenu anū ẹhni a ma anū mahia a nkari nkari. ¹⁸ M nọorio masi ma Chiokike kpume anya ke ovu anū, ma anū ghohia olile anya o nyernu ele o sukwuru, nū ẹkwnu ngozi zi igwugwu o kweru ele ke a nū mkwna. ¹⁹ M nọorio masi ma anū mahia iknernema a ke nwée atū bụ ke o nyernu aị ele kweru nū Karaịsi. O bụ okne iknernema ka ²⁰ ke Chiokike jiri mee Karaịsi hi n'ẹnwu lizo, mee ọ daziri ẹli n'akarikwnunga Chiokike n'oligwe, ²¹ hne kakwo kpakara ọchichi nū rikne nū iknernema nū ele nwe. Rẹwhna a kakwo kpakara nhne ke nwernu rẹwhna, ọ bụo n'ige ka kpọi, kovu n'ige ke jaava. ²² Chiokike bitaru kpakara nhne nū mkpururu ọchi Karaịsi, mee a ọ bụru risi kpakara nhne ma ọgbako Chiokike naahia ngozi. ²³ Ọgbako Chiokike bụ ẹhni Karaịsi, Karaịsi jihiaru n'ọgbako Chiokike. Karaịsi bụ nye mezuru kpakara nhne n'apna ọbula.

2

Hite n'ɛnwu bna nu budnu

¹ Nu mbom, anu nu lele ele nwurru onwu, ele be kewamarnu hne Chiokike zi kwnornu nu anu bnone nsni, mee nhne ojo. ² N'ige wam anu wuru budnu ojo lele ele zi n'owa. Anu snornu badnu ojo wam ke neechi kpakara renwu ojo n'owa. Setani bu renwu ojo wam ke nonu ernu nu mkpoma ele za noobnonu Chiokike nsni kitna. ³ Kpakara ai wuru budnu n'esilawuru be n'ige wheru ewhe lele kpa nhne nongwu ano-ehni ai. A snornu ele berere mezu nhne echiche ojo ai pioru, kam kpayaru, a buru ele ke ovu owe ehni Chiokike dnakwasiri.

⁴ Kovu Chiokike bu nye obirizi k'agida. Owhnun'anya a zi agida hne a zi. ⁵ O bu n'ezini nu a bu ele nwurru onwu nu rime mmehie, kovu Chiokike mernu ai nu Karaishi ziri budnu nga o mernu Karaishi hi n'ɛnwu lizo. Chiokike znohiaru anu kwnornu nu oru a. ⁶ Chiokike mernu a snornu Karaishi hi n'ɛnwu lizo. O mee ai nu Karaishi Jizosi daziri eli nu hne kakwo n'oligwe. ⁷ Chiokike mernu ka ma kpakara ele badnu mahia n'ige vazne nu ruwhnu ekwunu ke oru a ke nwee atu ke o jiri ovu oma a gesi ai nu rime Karaishi Jizosi. ⁸ Kwnornu nu Chiokike jiri oru a znohia anu hite n'okwnata mkpoma nu Karaishi. O buo kwnornu nhne obula ke anu mernu. Onohia anu bu nkesi hi n'aka Chiokike. ⁹ O buo ernu oma obula anu nruru, o za nye ji a mee oknomokno. ¹⁰ A bu ernu aka Chiokike. O kpuru ai ma ai nu Karaishi Jizosi ziri n'otu rnu ernu oma Chiokike beru osno kwabitanu ai.

A bu otu nu Karaishi

11 Anụ chenwanya nụ mbòm anụ ele bụo ele Ju hite nụ ọmumu anụ. Anụ bụ ele ke ele Ju be kparụ nka neeledna anya, nookwu anụ ele be kpáge nka. Ọkpa nka bụ ke be jiri aka kpa n'anọ-ẹhni. 12 N'ige wam, be kewamarnụ anụ hne Karaịsi zị, anụ bụo ele Izireli, ke kpayarụ, anụ nwée igwe nụ mkwna Chiokike kweru ọ znọhia Izireli. Anụ wuru bụdnu n'owa ka lele ele nwée olile anya, anụ máa Chiokike nụ mbòm. 13 Anụ bụ ele be kewamarnụ hne Chiokike zị nụ mbòm, kọvu kịtna, Chiokike mernu anụ nụ Karaịsi ziri n'otu, mee masị anụ va nụ ruwhnu a hite n'ovnarna Karaịsi wụsiri kwnornu anụ.

14 Karaịsi mernu udno ziri n'esilawuru ele Ju nụ ele bụo ele Ju nga o mernu ele Ju nụ ele bụo ele Ju otu badnụ. O mernu ka nga o jiri anọ-ẹhni a kwnadna mkpọ irno ke kewamarnụ ele Ju nụ ele bụo ele Ju. 15 Karaịsi luluru iwu ele Ju hite n'ẹnwu a ma o gweru ele Ju nụ ele bụo Ju ele kweru mee otu badnụ ikne, mee ma udno ziri n'esilawuru be. 16 Karaịsi mernu ele Ju nụ ele bụo ele Ju nụ Chiokike ziri n'udno hite n'ẹnwu ọ nwurnu n'olu ọgba, mee be bụru otu badnụ. Ka gwemernu irno n'esilawuru ele Ju nụ ele bụo ele Ju. 17 Karaịsi varụ zni anụ izi ọma udno, anụ ele bụo ele Ju nụ aị ele Ju masị. 18 Hite nụ Karaịsi, kpakara aị nwernu oghere o znekwnusi Chiokike Nda aị hite n'otu Enine.

19 Kam kpayarụ, anụ ele bụo ele Ju buma ele izne, kọvu anụ gholam rụmu Chiokike nụ ele ezinụ-oro Chiokike. 20 O wukwasiri anụ lele ọro n'olu ntụ-ẹli ele izi nụ ele ọwhnurninya, hne Karaịsi Jizosi n'iwhuru a bụ risi nsukala ọro. 21 Ya bụ ngalaba

jigwu ọro n'otu, ọro wam noosopiya bụru Ọro Nsọ be bítaru nsọ nyee Nyenwe aị. ²² Be wukọtaru anụ n'otu nụ rime Karaịsi, ma anụ bụru Ọro Nsọ hne Enine Chiokike wu.

3

Pọlu nye ẹrnu ele bụo ele Ju

¹ Kam kpayarụ, mawa Pọlu, m bụ m nye ikelu kwnornu Karaịsi Jizọsi nụ kwnornu risi anụ ele bụo ele Ju neekpenu Chiokike. ² N'ezi, anụ nurnu nhne gbasiri kpa Chiokike nyernu m ẹrnu o mee anụ ele bụo ele Ju mahia oru a. ³ Chiokike mernu m mahia nhne miri emi ke badnụ máa nụ mbom, lele kpa me gbarụ a n'okwukwo matị nụ mbom.

⁴ Nga anụ gwnurnu ka anụ jọowhnu nụ Chiokike mernu m ghohia nhne miri emi gbasiri Karaịsi. ⁵ N'ige wheru ewhe, Chiokike kpúmene ele badnụ nhne ka, kovu kịtna Enine Chiokike kpumennu a ele izi nụ ele ọwhnurninya ele ọ hohiaru. ⁶ Nhne miri emi wam bụ anụ ele bụo ele Ju ele kweru nụ ele Ju ele kweru ghoru otu anọ-ẹhni. Anụ joosno masị ele Ju kehia nhne Chiokike kweru be nụ mkwna hite nụ Karaịsi Jizọsi kwnornu nụ izi ọma.

⁷ Chiokike nyernu m ẹrnu ke o zni izi ọma ka kwnornu ovu ọma a. O mernu ka hite nụ rikne a nọornu ẹrnu nụ rime m. ⁸ Ọ bụ n'ezi nụ m kwésile m, kovu Chiokike nyernu m oru a n'esilawuru ele ke a, o zni anụ ele bụo ele Ju izi ọma ke okne nhne gbasiri Karaịsi ke ele badnụ nwée rikne ghohiali. ⁹ O nyee kwno m ẹrnu o mee kpa ele badnụ jaamahia kpa o jeeme nhne miri emi ka. Chiokike nye keru kpakara nhne kpusnirni nhne

miri emi ka n'anya ele badnu agida ige wheru ewhe. ¹⁰ Echiche a bu ma kpakara rikne ke nechi echi n'oligwe mahia akoniche Chiokike ke hna ezi hite n'ogbako a.

¹¹ Ka bu nhne Chiokike vu nu mkpoma su o kpuru owa. Kitna, o mezuru a hite nu Karaisi Jizosi Nyenwe ai. ¹² Ai nu Karaisi bu otu, a kweru nu ya, kam kpayaru, a nwernu mkpoma siri rikne o zne nu ruwhnu Chiokike, enwe ogwnu. ¹³ M naariasno anu, anu bikno kwé rikne gwu anu kwnornu awnwhnu me naatanu anu, ke jeegweyanu anu igwugwu.

Karaisi whnuru ai n'anya

¹⁴ Kam kpayaru, me gwu mpnerne ochi kpenu Chiokike Nda, ¹⁵ nye jiri kpakara ezi-nu-oro ke zi n'oligwe nu owa rewhna be. ¹⁶ M nọorio Chiokike ma o hite n'ekwnu ke ngozi a, nyee anu iknernema hite n'Enine a ma mkpoma anu si rikne, ¹⁷ ma Karaisi hite n'okwnata ovu wuru nu rime mkpoma anu, ma anu gba egwnugwnu, gwuzoru chim chim n'owhnun'anya a. ¹⁸ M nọorio masi ma anu nu kpakara ele Chiokike mahia owhnun'anya Karaisi nwernu hne a zi, kpa o hna nu rude, nu ogologo a, nu kpa o hna n'olu, nu omimi a, ¹⁹ ma anu mahia owhnun'anya ka ke kakwo nhne badnu etekne nwernu rikne ghohiali. M nọorio ma Chiokike mejhia anu nu kpakara nhne Chiokike bu.

²⁰ A ja Chiokike, nye nwernu rikne o mee kakwo kpa a nwernu rikne riu mabu ri hite nu iknernema a ke nornu ernu nu rime ai. ²¹ Ngwa ma ai ogbako Chiokike ele o mernu ai nu Karaisi Jizosi buru otu,

ja Chiokike hite n'otu ebiri du n'ebiri berere, owa kwnurnu owa. Amim.

4

A bu otu nu rime Karaisi

¹ Mawa, nye ikelu kwnornu Nyenwe a, naariasno anu, anu wu budnu kwesiri ikwu Chiokike sukwuru anu. ² Nhne obula anu neeme, anu gweru ovu hieru eli nu ozi wohnernerne nu ndidi naabnanya ibne anu kwnornu anu whnurnu ehni anu n'anya. ³ Anu gbalu o bita ozi n'otu ke Enine hite noowu n'udno n'esilawuru anu. ⁴ Ele Chiokike bu otu anu-ehni, a nahiaru otu Enine, lele kpa Chiokike sukwuru anu n'otu olile anya. ⁵ A nwernu otu Nyenwe a, okwnata mkpoma a bu otu, owuwu mini a bu otu. ⁶ A neekpenu otu Chiokike bu Nda kpakara badnu, nye nechi kpakara badnu, o noornu ernu hite nu kpakara badnu, nye zi nu rime kpakara badnu.

⁷ Karaisi nyernu nye obula nu rime a rikne o rnu ernu lele kpa o kpebiri a. ⁸ Lele kpa be gbaru a n'okwukwo nsu,

“Nga o laru olu,

o doru agida ele irno a n'ohi, be snornu a n'aznu,

o nyee ele badnu nkesi.”

⁹ Kini bu n'okwukwo nsu kwuru nu o laru n'olu? O bu nu Karaisi beru osno hiedna n'owa ka. ¹⁰ Nye wam hiednarnu n'owa bu masi nye laru hne kakwo n'olu n'oligwe, ma o jihia kpakara nhne.

¹¹ Karaisi bu nye wam, nye nyernu ele badnu rikne o rnu ernu, mernu agwna badnu ele izi, ele berere ele owhnurninya, ele berere ele naagagharu nookpo

okwo izi oma, ele berere ele nooznu atnurnu nu ele neezni nhne. ¹² O mernu ka ma o jiknernu ele Chiokike ma be rnunu a ernu, ma ogbako Chiokike nooso, gwuzosi rikne, ¹³ tem a du n'ozu n'otu ke okwnata ovu, nu o mahia Nnwọ Chiokike, ma a buru ele sozuru nu badnu, ele duru nu nhne otutu ke zuru ozu nu rime Karaisi.

¹⁴ Ige wam a jobuma rumu takiri. Ele aghigho nu ele nooduwhu ele badnu jéegweru iznizni aghalaghala obula ruwhere noovughari duwhu ai, lele kpa abaka-mini nu ruwhere noovughari ogo n'olu mini. ¹⁵ Tnunuma, a gweru owhnun'anya nookwu ezi oka, ma a nooso lele Karaisi Nyenwe ai nu nhne obula. ¹⁶ Karaisi neeknekota ele ke a n'otu, lele kpa ruknani jikotaru kpakara nhne zi n'ehni badnu n'otu. O buru nhne obula zi n'ehni noornu ernu a, kpakara ehni joburu nhne gwuzosiri rikne n'owhnun'anya.

Budu ikne nu rime

Karaisi

¹⁷ Kam kpayaru, m ji m rewhna Nyenwe ai noodo anu aka nu sni, anu wuma budu lele ele ma Chiokike, hite n'ori oriri ke nwée mbnarna. ¹⁸ Ele ka nwée rikne o ghohia nhne gbasiri Chiokike. Be kewamarnu be hne Chiokike zi kwnornu nu be ma Chiokike, be bu ele risi rikne. ¹⁹ Iwhnerne o mee nhne buo oma tu be. Be bu ele neeme nhne ojo ke gwnurnu be, ma be neeme nhne so ize n'anya lele kpa o noogwnusi be rikne.

²⁰ Kovu ki buo nhne anu muhiaru gbasiri Karaisi.

²¹ N'ezi, anu nurnu nhne gbasiri a, be znirni anu ezi oka zi nu Jizosi. ²² Be znirni anu sigbasi budu oknani wam anu noowu. Badnu oknani wam

neeji kpakara nhne nọogwnu anụ nooduwihu anụ, noolulu masị bụdnu anụ. ²³ Kịta, anụ gharu Chiokike ma o gbanwo echiche anụ. ²⁴ Anụ wuru bụdnu ikne ke Chiokike nyernu anụ, ma anụ bụru ele ke Chiokike, ele mee mma, ele zị masị nsọ n'ezi.

²⁵ Kam kpayaru, anụ gháma aghalaghala, nye obula kwunu ibne a ezi oka, kwnornu nụ a nụ lele nhne zị n'otu eñni. ²⁶ O bụru nụ ovu we anụ eñni, anụ mékọ mmehie, anụ kwéko ovu owe eñni anụ daziri tem eñnam dna. ²⁷ Anụ nyéko Ekwensu oghere nụ bụdnu anụ o rnawhu anụ. ²⁸ Nye buznu znúma buznu, o gweru aka a rnụ ẹrnu kwesiri ma o yinu ele zị nụ mkpa aka.

²⁹ Anụ kwé oka búo oma hi n'ọnu anụ whuya, kovu anụ kwu oka bụru oma ke jeeme badnu gwuzosi rikne n'okwnata mkpoma a. Ige obula, anụ kwu nhne bụru oma nụ nsni ele badnu ma be wulizo be olu lele ọro. ³⁰ Anụ mée Enine Nso Chiokike ovu owe eñni, bu ke Chiokike jiri hñasi anụ iri nụ anụ bu ke a tem du n'ige anụ jeenwernukwo eñni anụ. ³¹ Anụ gweme kpakara mkpoma nlulu, nụ onuma, nụ ovu owe eñni, ya nụ olu ogwnu nụ okaja nụ irno mkpoma. ³² Kovu anụ nwe ovu oma, whnu ibne anụ n'anya, naagbarunu ibne anụ lele kpa Chiokike gbarunu anụ kwnornu Karaịsi.

5

¹ Lele rumu Chiokike whnuru n'anya, anụ wu bụdnu lele Chiokike. ² Anụ wuru bụdnu owhnun'anya, lele kpa Karaịsi whnuru ai n'anya, gweru bụdnu a kwanu Chiokike arịohna ke nwernu eknarna oma kwnornu ai.

³ Anụ kwé be whnụ ewhere, mọbu nhne zila rịchna, mọbu anya-kwu n'esilawuru anụ. Nhne ele ka kwésile ele Chiokike zị nso. ⁴ Anụ kwú ọka tị iwħnerne, mọbu ọka iwħnirniwhno, mọbu ọka bnána nụ nhne, ke kwésile, tñnuma, anụ tñnu Chiokike mmamma. ⁵ Kwnornu nụ anụ magwụ nụ ọ zá nye naagba ewhere, mọbu nye zila rịchna, mọbu nye anya-kwu, ke nụ lele ọkwa rēnwu, nwernu igwe nụ nhne ọma ke ẹli-eze Karaịsi nụ Chiokike.

⁶ Anụ kwéko badnụ ọbula gweru ọka etekne rnawhu anụ. Chiokike jaata ele zá noobnonu a nsni awħnụwhnu kwnornu nụ nhne nụ kpa. ⁷ Kam kpayarụ, anụ nụ ele nụ kpa méko nhne.

⁸ Anụ zị n'ọchichiri nụ mbom, kovu kịna anụ bnarnụ n'iwħne Nyenwe aị, anụ wu budnu kwesiri ele zị n'iwħne. ⁹ Ele zị n'iwħne naamị mkpuru ọma ke ovu ọma, ome mma nụ ezi ọka. ¹⁰ Anụ piohĩa, neeme masi nhne jaakpasu Nyenwe aị ovu ọso n'onu. ¹¹ Anụ snó ẹrnu ọchichiri ke nwernu mkpuru bnáge nụ nhne kekọ nhne, kovu anụ bigbo be, ma nhne ojo be mernu whụya iwħne. ¹² Kwnornu nụ ọ nọtụ iwħnerne o kwu nhne ele zá noobnonu Chiokike nsni neeme nụ mgwugwa. ¹³ Kovu iwħne jeeme kpakara nhne whụya iwħne. ¹⁴ Kwnornu nhne ọbula ke iwħne kpumernu búma nhne zị nụ mgwugwa. Kam kpayarụ, be karụ,
 “Tnenya, jị nye neezni anyarna,
 jị nye nụ lele nye nwurnu ọnwu, lizo,
 Karaịsi jomukwasi i iwħne a.”

¹⁵ Anya dụ anụ ẹli kpa anụ noowu budnu anụ. Anụ wú budnu lele ele iwħnirniwhno, kovu lele ele nwernu akoniche. ¹⁶ Anụ gweru oghere ọbula

anụ nwernu rñụ ẹrnu ọma, kwnornu nụ ele badnụ nọornu ẹrnu ojo k'agida n'ige ka. ¹⁷ Anụ búo ele iwh-nirniwhno, tnụnuma, anụ yisi ẹhni piohia, neeme masị nhne Nyenwe aị pioru. ¹⁸ Anụ nwọ manya ke naabna n'anya, ke joolulu budnu anụ. Tnụnuma, anụ gharu Enine Chiokike ma o mejihia oву anụ. ¹⁹ Anụ gweru eri ọma, eri ọznarni nụ eri mkpoma ọso n'ọnu kanu ibne anụ oka, gweru kpakara mkpoma anụ gwnunu Nyenwe aị eri, ²⁰ nọtunu Chiokike bu Nda mmamma ige obula kwnornu kpakara nhne nụ rewhna Nyenwe aị Jizosi Karaịsi. ²¹ Ele Chiokike bita ẹhni be nụ mkpururu ibne anụ kwnornu nụ anụ nọsobisinu Nyenwe aị Karaịsi.

Nzi nụ nnwerne

²² Ele bu nnwerne anụ bita ẹhni anụ nụ mkpururu nzi anụ lele nụ anụ bitaru ẹhni anụ nụ mkpururu Nyenwe aị. ²³ Kwnornu nụ nzi bu risi nnwerne lele kpa Karaịsi bu risi ọgbako Chiokike. Ọgbako Chiokike nụ lele anọ-ẹhni Karaịsi. Karaịsi bu Nye Ọznohia ọgbako a. ²⁴ Lele kpa ọgbako Chiokike zi nụ mkpururu Karaịsi, kpam masị, nnwerne obula bita ẹhni a nụ mkpururu nzi a nụ kpakara nhne.

²⁵ Ele bu nzi, anụ whnu nnwerne anụ n'anya lele kpa Karaịsi whnurnu ọgbako a n'anya nwu kwnornu a, ²⁶ ma o mee a ọ ziri nsọ, o gweruru ikwu-onu Chiokike nụ mini snu a, mee a, ọ ziri richna. ²⁷ Karaịsi mernu ka ma o chetenu ọgbako wam n'ẹhni a, lele nhne zi igwugwu, nwée rune, mọbu ruwhnu doliri odili, mọbu nhne ojo berere, tnụnuma, ọgbako ke zi nsọ, ke nwée ọtna. ²⁸ Kpam masị, nzi kwesiri ọ whnu nnwerne a n'anya lele

kpa ọ whnuru ẹni a. Nye ọbula ke whnuru nnwerne a n'anya whnuru ẹni a n'anya. ²⁹ Ọ zá badnu ọbula ke snornu ẹni a irno, kovu o nooznu, neelekwa ẹni a anya nkari. Ọ bu masi kpa Karaisi neelekwa ọgbako Chiokike, ³⁰ a bu nhne zi n'ẹni Karaisi. ³¹ Kam kpayaru, nyerukna jaagharu nda a nu nne a, takwnusi n'ẹni nnwerne a, be lawuru gho otu badnu. ³² Ka bu nhne miri emi k'agida, kovu m nookwu gbasiri Karaisi nu ọgbako Chiokike. ³³ Nyerukna ọbula n'esilawuru anu, whnu nu o whnuru nnwerne a n'anya lele kpa ọ whnuru ẹni a, nnwerne masi, whnu nu o nooso nzi a anya.

6

Rumu takiri nu ele muru be

¹ Rumu takiri, anu noobnonu ele muru anu nsni lele kpa Nyenwe a pioru, kwnornu nu o buru oma o mee kpm. ² Lele kpa be gbaru a n'okwukwo nsọ, “Sobisinu nda i nu nne i.” Ke bu nhne mbom ke Chiokike nyernu n'iwu ke nwernu mkwna. ³ I mee kpm, nhne jaagakwanu i nkari, ma i ziri budnu ogologo n'owa. ⁴ Ele bu nda, anu mee nhne jaakpasu rumu anu ovu owe ẹni. Tnunuma, anu gweru ikwu-onu Chiokike nooznu, neezni be.

Ele ọhi nu ele nwe be

⁵ Ele ọhi, anu noobnonu ele nwe anu nsni, anu so be anya, notu ogwnu be. Anu gweru mkpoma anu neeme a lele anu neemenu a Karaisi. ⁶ Anu bnonu be nsni, o buo ke anya noowhnu kpọi lele ele neeme nhne naamasị badnu, kovu noobnonu be nsni lele ele ọhi Karaisi, ele neeme nhne Chiokike

pioru hite nụ mkpoma anụ. ⁷ Anụ gweru ova oma nọonu ọnu lele nụ anụ bu ọhi Nyenwe aị, buo ke badnu. ⁸ Kwnornu nụ anụ magwu nụ Nyenwe aị jookwu nye obula ogwo ọnu oma a, ma ọhi mọbu nye buo ọhi.

⁹ Kpam masi, anụ ele nwe ọhi, anụ mee masi ele ọhi anụ kpam. Anụ kpaasi be ogwnu, hne anụ maharu nụ Nyenwe anụ nụ be zi n'oligwe. O za neele badnu anya nụ ruwhnu.

Mgwna ogwnu Chiokike

¹⁰ Ka bu oka ipne-aznu m, anụ gbasị rikne nụ Nyenwe aị nụ okne iknernema ke a. ¹¹ Anụ woru kpakara mgwna ogwnu Chiokike nyernu anụ, ma anụ nwernu rikne o gwuzogidne kpakara nhne ke Ekwensu neeziya. ¹² Kwnornu nụ a za nọolu ogwnu megidne ele badnu etekne. Kovu a nọolu ogwnu megidne kpakara ele ochichi, megidne kpakara rikne, megidne kpakara ele nwe owa ke ochichiri ka, megidne ele renwu ojo ke zi n'olu. ¹³ Kam kpayaru, anụ woru kpakara mgwna ogwnu Chiokike nyernu anụ ma anụ nwernu rikne o gwuzo n'obochi ojo, nga anụ mezuru kpakara nhne, o gwuzoru chim chim.

¹⁴ Anụ jiknenu o lu ogwnu, anụ suru ezi oka n'ikwnu anụ ke nụ lele ajni. Anụ woru ome mma ke nụ lele mbno nụ mkpoma anụ. ¹⁵ Anụ gweru masi ojiknenu o kpo okwo izi oma ke udno woru n'ochi lele okoro-ochi. ¹⁶ Tukwasi n'olu ka, anụ gweru okwnata mkpoma nụ Chiokike ke nụ lele ekpeke anụ jeeji mesni kpakara mkpakwu bekwu ke Ekwensu naagba megidne anụ. ¹⁷ Anụ kpuru oznohia nụ risi anụ ke nụ lele okpu-ogwnu.

Anụ gweru ama-ogwnu ke Enine neenye, ama-ogwnu wam bụ ikwu-ọnu Chiokike. ¹⁸ Anụ neekpe okpukpe lele kpa Enine noodu anụ ige ọbula n'ọnodi ọbula. Anụ neese nse kpa anụ neekpe okpukpe, anụ gwuzosi rikne kpa anụ neekpenu kpakara ele Chiokike okpukpe.

¹⁹ Anụ neekpenu m okpukpe masị ma Chiokike nyee m ikwu-ọnu ke me kwesiri o kwu ige ọbula me kpumernu ọnu m, ma m gweru ọnu rikne mee ele badnụ mahija nhne miri emi ke izi ọma, ²⁰ ke me bụ nye izi a n'oro ikelu. Anụ kpenu m okpukpe ma m kpọ m okwo izi ọma énwé ogwnu lele kpa me kwesiri.

Obekwu ikwu ipne-aznụ

²¹ Taiikikosi bụ nnwọ nda aị a whnurnu n'anya nye be kwesiri ọ kwnata mkpọma n'ernu Nyenwe aị jaakanụ anụ kpakara nhne gbasiri m, ma anụ mahija kpa me nụ, nụ nhne me neeme. ²² Ka bụ nhne me kwno neeziyanu anụ ya, ma anụ mahija kpa a nụ, ma ọ kasi anụ mkpọma.

²³ Udno ke Chiokike Nda aị nụ Nyenwe aị Jizosi Karaịsi dazinu ele kweru nụ Karaịsi, o mee anụ whnụ ibne anụ n'anya kpa anụ naakwnata mkpọma nụ Karaịsi. ²⁴ Oru ke Chiokike dazinu kpakara ele whnurnu Nyenwe aị Jizosi Karaịsi n'anya n'ezi.

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwere – (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files dated 29 Jan 2022

c17ee3a1-1c7a-5c05-8e0f-5043e8228d89